

Dr. Edward Cheung sumamente satisfecho con Green Aruba a bay e aña aki



E científico Arubiano trahando na NASA pa ultimo 20 aña, dr. Edward Cheung tabata na Aruba pa presidi conferencia Green Aruba, e aña aki den su di 6 edicion.

Prome cu el a bolbe Merca, dr. Cheung a duna un entrevista unda el a mostra di ta hopi entusiasmo cu e resultado di Green Aruba e aña aki.

“Mi a haya masha bon comentario e aña aki y segun mi mucho mas cu añanan anterior,” dr. Cheung a splica.

”Bo tin di compronde cu esnan

cu ta atende e conferencia aki ta atende conferencianan rond di mundo y Merca. Mi a haya e comentario cu esaki ta un di e conferencianan mihor organisa cu nan a yega di atende.”

Green Aruba, hunto cu Aruba Learning Event, tabata e aña aki den cuadro di ‘Aruba Sustainable Week’ y a tuma lugar den e salanan di conferencia di Aruba Marriott Resort e ultimo siman di october.

Dr. Cheung a fungi como maestro

di ceremonia di Green Aruba, pero tambe como moderador di dos discusion den panel.

Tabatin varios discusion den panels e aña aki, algun riba ‘policy’, otronan riba temanan mas tecnico y sistematico of un combinacion.

“E prome tabata modera pa Prome Minister Mike Eman, y bisabo francamente, como team nos a puntra nos mes con e por bay haci esey, pasobra nunca el a haci algo asina den un ramo politico combina cu uno hopi tecnico, pero nos a keda sorprendi con bon e discusion a bay.

Echt, Prome Minister tabata al tanto di tur e topiconan y a haci preguntanan hopi bon y al caso cu a saca e informacion cu esnan den publico tabata tin mester. Esey a bay masha bon mes.”

“E otro panelnan, cu tabata modera pa otro moderadornan tambe a bay sumamente bon,” dr. Cheung a enfatisa, “y mi ta kere cu e format aki tabata mihor cu e añanan pasa, pasobra den añanan anterior e maestro di ceremonia ta-

bata modera tur e discusionan den panel, pero nos no por ta mesun experto tur ora compara cu e resto di miembronan di panel. Y asina el a dreii mucho mas mihor.”

Pa loke tabata e organizacion en general, dr. Cheung tabata hopi contento cu e resultado. Basa riba experiencia di e añanan cu a pasa, p.e., a haci cambio riba e cantidad di slidenan cu presentadornan y miembronan di panel por a uza.

“E aña aki nos a repasa presentacion y slidenan prome pa wak kico tin di contenido y nos a corta den e cantidad di slidenan, y esey a trece cu ne cu tur panelista tabata mucho mas enfoka y concentra riba nan tema y na final a tuma mucho menos tempo pa presentanan vision of idea. Consecuentemente no tabatin mester di a pura ningun hende pa haci mas liher pa falta di tempo. Tur a bay ‘smooth’ y no tabatin slidenan na exceso.”

Pa loke t’e conferencia den su totalidad, dr. Cheung tabata hopi contento cu e materia, e cantidad di participantenan, “e tabata tremendo for di cuminsameto te final.”

Preparacionnan a cuminsa caba pa siguiente Green Aruba. Dr. Cheung no por a bisa mucho di e plannan specifico pa 2016, pero si cu el a wordo invita caba pa presidi y modera Green Aruba su di 7 edicion.